

Memerangi Penyebaran Kristian di Indonesia

Majalah (*(Al-Shabbān al-Muslimīn)*) lidah rasmi “Pertubuhan-pertubuhan Pemuda Islam” di Republik Arab

Bersatu, dalam keluaran bulan Dhū al-Hijjah 1381 – April 1962, telah menyiaran satu berita yang

memperikan bahawa Republik Indonesia sedang memberi galakan kepada penyiar-penyiar agama Kristian, terutama

dalam kalangan tentera Indonesia.

Majalah (*(Al-Shabbān al-Muslimīn)*) telah menyiaran berita itu seperti berikut:

(Disalin Oleh: Abdullah Bin Awang, Penuntut al-Ma'had Muhammadi Kota Baharu)

Al-Ustādh al-Fādil Muhammad Taufiq Ahmad, Ketua ((Dār Tablīgh al-Islām)) di Kaherah telah menulis tentang sebuah makalah yang penting yang telah disiarkan oleh akhbar (*(Minbar Geneva)*). Akhbar ini ialah sebesar-besar surat khabar yang diterbitkan di Switzerland dalam bahasa Perancis.

Makalah yang penting itu ditulis oleh ((Jaak Moto)) dan telah diterjemahkan – ke bahasa Arab – oleh Dr. Zaki Ali yang tinggal di Geneva.

Dalam makalah itu, antara lain-lain ada disebutkan:

“Bahawa Indonesia memberi galakan kepada penyiaran agama Kristian di Indonesia untuk memerangi perbuatan taksub (tingkah laku orang-orang Islam yang dicap oleh musuhnya dengan gelaran ((fanatik)) – P). Sebenarnya kerajaan Belanda sepanjang masa penjajahannya di Indonesia tidak berani menggalakkan penyiaran Kristian kerana takutkan kesan balas dari kalangan orang-orang Islam.

“Sedang pada masa ini pemerintah Indonesia menggalakkan penyiaran Kristian, terutama dalam kalangan

tentera Indonesia yang dipandang oleh penyiar-penyiar Kristian hari ini menjadi sebesar-besar medan untuk penyiaran Kristian dengan sokongan dan bantuan pemerintah Indonesia. Seyogia disebut, pemerintah Indonesia telah menyediakan kepada gereja-gereja Protestan dan pertubuhan-pertubuhannya sebanyak 260 paderi-paderi Kristian Protestan yang diberi jawatan untuk bekerja dalam barisan tentera dengan diberi segala kemudahan dan apa-apa jua yang dikehendaki oleh mereka. Usaha penyiaran Kristian dalam kalangan tentera sedang berjalan dengan hebatnya dan segala persiapan sedang dijalankan supaya kitab-kitab Injil segera dicetak untuk digunakan di Indonesia terutama di Pulau Jawa. Selain daripada itu di Jakarta ada sebuah kolej untuk pengajaran agama Kristian Protestan, sebagaimana di ((Malang)) (Jawa Timur) dan di Jakarta – kubu Islam – ada dua buah sekolah Kristian untuk mengeluarkan penyiar-penyiar Kristian dan paderi-paderi.”

Penulis makalah itu, Jaak Moto, telah menutup

tulisannya dengan berkata:

“Oleh itu, bolehlah kita mengharapkan kekuatan semangat penyerbuan (siaran Kristian dalam kubu-kubu Islam – P.) yang nyata kelihatan dalam kalangan pihak yang bertanggungjawab bagi gereja-gereja Protestan di Tanah Jawa, yang menjadi salah satu kawasan yang jarang-jarang ada seumpamanya di seluruh dunia, yang didapati di dalamnya orang-orang Islam keluar dari agama mereka untuk memeluk agama Kristian. Oleh itu kita berharap bahawa semangat yang sedemikian ini memberi bantuan untuk penyiar-penyiar kitab-kitab Injil di sana dengan cepatnya!!”

Bersama-sama dengan makalah yang tersebut telah disiarkan gambar tentera Indonesia dan dituliskan di bawahnya seperti berikut:

“Tentera Indonesia terhitung sebesar-besarnya seluas-luas medan bagi peniaran Kristian”.

Tatkala mengulas berita ini, majalah *al-Shabbān al-Muslimīn* berkata:

“Kami dalam masa mengucapkan terima kasih kepada Dr. Zaki Ali tentang ghairahnya yang bersemangat Islam, dan berterima kasih juga kepada *al-Ustādh al-Fāqīl Muhammad Taufiq Ahmad Ketua ((Dār Tablīgh al-Islām))* tentang sikap kesedaran yang sedemikian ini dan pembelaannya yang ikhlas terhadap agama Islam adalah kami berasa takjub tentang usaha-usaha yang bersungguh-sungguh dari penyiar-penyiar Kristian, untuk mengkristiankan orang-orang Islam di negara Indonesia Islam. Lebih-lebih lagi kami berasa hairan dan takjub memikirkan sikap pemerintah Indonesia membiarkan penyiar-penyiar Kristian itu menjalankan usaha-usaha mereka dengan mahrajalela dengan alasan tidak mahukan perbuatan taksub?!”

Kami sedia mengetahui bahawa dalam negara Indonesia

ada Kementerian Hal Ehwal Agama, yang bertugas menerangkan hal ehwal agama dan syarak di samping mendidik rakyat Indonesia dengan didikan dan pengajaran Islam yang berpandu kepada petunjuk agama, dan bahawa di antara tugas-tugasnya juga ialah menyiaran Islam di segala ceruk rantau Indonesia, sebagaimana di sana ada beberapa buah pertubuhan Islam, seperti ((Muhammadiyyah)) yang telah didirikan semenjak tahun 1912, ((Nahdatul Ulama)) dan ((Persatuan Islam)) yang telah terdiri sebelum Perang Dunia yang kedua.

Di Indonesia juga wujud perikatan parti-parti dan pertubuhan-pertubuhan Islam yang terkenal dengan nama ((Masyumi)). Demikian juga pertubuhan pemuda Islam yang terkenal dengan nama ((Pergerakan Pemuda Islam Indonesia)).

Persatuan-persatuan dan pertubuhan-pertubuhan Islam ini adalah bekerja di Indonesia menyiaran Islam, mendirikan sekolah-sekolah, mengembangkan pelajaran, menghidupkan syiar-syiar agama, dan memperkuatkan kedudukan agama Islam di sana. Oleh sebab itu besarlah harapan kami bahawa persatuan-persatuan dan pertubuhan-pertubuhan Islam itu akan bekerjasama dengan Kementerian Hal Ehwal Agama di Indonesia untuk memerangi penyiar-penyiar Kristian di sana dan menyekat kecergasan mereka yang berdasarkan penjajahan yang jahat itu. Sebagaimana juga kami berharap supaya ((al-Azhar)) mengambil berat untuk melaksanakannya dan bekerja untuk menggagalkan langkah-langkah dan tujuan penyiar-penyiar Kristian itu.))

(Peringatan: Kementerian Agama Indonesia, mengandungi beberapa bahagian: ada Bahagian Islam dan ada pula Bahagian Kristian. Masing-masing itu terletak di bawah Menteri Agama dan bebas menjalankan kerja masing-masing. – P).